





Nakon što su prošli provjere SIPA-e i CIK-a Imenovani novi članovi Vijeća ministara

Predsjedavajući Vijeća ministara BiH Vjekoslav Bevanđa (HDZ) imenovao je Borisa Tučića (SNSD) za ministra vanjske trgovine i ekonomskih odnosa, Miladina Dragičevića (SNSD) za zamjenika ministra odbrane i Živka Marjanca (SP) za zamjenika ministra za ljudska prava i izbjeglice. Potvrdio je ovo za „Dnevni avaz“ Zvonimir Kutleša, generalni sekretar Vijeća ministara BiH.

No, do zvaničnog preuzimanja funkcija Tučić, Dragičević i Marjanac morat će sačekati saglasnost Predstavničkog doma Parlamentarne skupštine BiH.



Dragičević i Marjanac: S Tučićem prošli provjere

- Predsjedavajući Bevanđa prijedlog o imenovanju već je uputio Komisiji za pripremu izbora Vijeća ministara BiH, Predstavničkog doma i mislim da nema zapreka da se taj Dom o imenovanjima izjasni već na sjednici 5. decembra - kazao je Kutleša.

Prije imenovanja ministra i dvojice zamjenika, predsjedavajući Vijeća ministara dobio je pozitivne izvještaje o provjerama kandidata koje su izvršili Centralna izborna komisija i Državna agencija za istrage i zaštitu.

S. D.